



Nipilersortartut immiussinissamut aningaasartuutaannut 10.000 kr.tikillugu tapiissummik misiliutaasumik 2021-miit augustip aallaqqaataani atuutilersussamik Naalakkersuisut pilersitseqqullugit Inatsisartut aalajangiiffissaattut siunnersuut. Katillugu ukiut marluk ingerlaneranni 300.000 kr.-nik aningaasalerneqassaaq, Nunatsinni nipilersukkanik saqqummersitsisarnerup siuarsarmissaanik siunertalimmik. Misilittagaalersimasut nalilersuinissamut atorneqassapput avammut tunisassiornikkut kiisalu eqqumiitsuliornikkut siuariarsimanermit sunniuteqarsimanersut.

(Inatsisartunut ilaasortaq Aqqalu C. Jerimiassen, Atassut)

(siullermeernera)

Atassutip Inatsisartuni ilaasortaatitaanut Aqqalu C. Jeremiassenimut siunnersuuteqarneranut qujanaq.

Demokraatit isumaqarput, maani Nunatsinni pikkorissorpasuarunik eqqumiitsuliortuuteqartugut. Aamma tamanna nipilersornermiippoq. Nutaaliorinnaanerput tulluusimaarutigissavarput. Qularutissaanngilarli, eqqumiitsuliortuutigut unaminartorsiortaquisut nunatsinni nioqquteqarniarnik annikimmat.

Nioqquteqarniarneq ima annikitsigaaq, eqqumiitsulianik inuussuteqarniarneq ajornarluinnagajalluni.

Taamaattumik nipilersortartoq nunat assigiinngitsut akornanni nipilersukkani inuuniutigissagunigit, nunani allani tusaamaneqalertariaqarluni tamannalu ajornaatsuinnaanngilaq. Nunarsuarmi piginnaaneqarluartunik nipilersortartorpassuaqarpoq niuernerpalaartumik iluatsitsinngitsunik. Tassunga pissagaanni iluatsiterujussuartaqarpoq, nipilersuutip aningaasarsiutigilluarnissaanut aammalu immaqa nunarsuarmi tusaamasanngorluni.

Taamaattumik nipilersortartunut kalaallinut periarfissaq taanna annikittuaraavoq. Tassunga atatillugu nipilersortartumut eqqaamassallugu pingaartuuvoq, nipilersortartuunermit soqtiginnilerneq aallartittarmat, nuannarinninnermit. Nuannaarneq taanna piviuassallugu pingaartuuvoq, nunarsuarmi tusaamaneqalernissamut takorluuineq piginnassagaanni.

Taava apeqqut pitsaasoq unaalissaaq, pisortat qanoq annertutigisumik tapiissanersoq, aammalu ullumikkumiit annertunermit tapiisassanersut? Una siunnersut Atassummersoq misiliummik aaqqissuussinissamik siunnersuutaavoq, nipilersortartut 10.000 koruunit tikillugit tapiiffigineqarnissamik qinnuteqarsinnaallutik immiussinerminnut aningaasartuutit matussuserniarlugit. Aningaasat agguagassat 300.000 koruuniussapput, taassumalu suliap piviusunngortinnissaanut allaffissornermut aningaasartuutit 500.000 koruuninik akeqassallutik.

Demokraatit isumaqarput, siunnersuut pitsaasuunngitsoq. Siullermik torrallaaneruallaanngilaq aningaasanit agguassassanit allaffissornermut aningaasat amerlanerusut atornissaat. Pisortat allaffissornerisa naleqqutinngitsumi annertusarnissaa. Aappassaatut immiussinermut aningaasartuutitut matussutissatut



10.000 koruunit naammangilluinnarput, taamaattumik ilimaginngilarput tapiissutip taama annertussusillip iluaqutaangaarnissaa.